

Index

- 1 Vörschauber (Joh. Levin) Disputatio
Dominum a Reivindicatōe.
- 2 Ansel (Joh. Bapt.) Disputatio
de Domino a Reivindicatōe.
- 3 Rabenstein (Christ. Friedr. de) Disser-
tum de jure Domini ad Pastali.
- 4 Kessel (Lamb.) De Dominis subditos
suos in iudicio suo convenientibus.
- 5 Meis (Jonathan) Disputatio de
Domino quam auditore.
- 6 Schröder (Johan.) Disputatio
de jure Domuum.
- 7 Oiden (Nichtas) Disseruum de
jurgum circa Domum cujusque propriam.
- 8 Franckenberger (Andreas) cum Geo
synopsis Conationum tum in
genera tum in specie.

- 9 Vincius (Joh. Nembel) et Socii Ciceronem
Simplius et relativus.
- 10 Krumpff (Christ.) Disputatio de
Differentiis juris... in Donationibus.
- 11 Laucher (Georg. Jacob.) Disputatio
de Donationibus.
- 12 Dreyer (Philipp. Eberh.) Disputatio
de Donationibus quaestiones.
- 13 Rottmeyer (Joh. Philip.) Disputatio
de materia Donationum quaestiones.
- 14 Pullus (Wilh. Jacobus) Disputatio
de Donationibus continens.
- 15 Bornemann (Jacob. Fridr.) Disputatio
de definitione miscellanea de Materia Donationum
- 16 Joly (Claudius) Theses circa Dona-
tionum materiam.
- 17 Stüben (Johann) Positione de
Donationibus.

18. Pickel, Ant. König / Ehrens ²ed
Donationen.

19. Bornemann (Lott) / Do
Donationen.

DISSERTATIO INAUGURALIS JURIDICA
EXHIBENS

DOMINVM A REI VINDICATIONE EXCLUSVM

SECVNDVM STATVTA HAMBVRGENSIA.

Quam

RECTORE MAGNIFICENTISSIMO
SERENISSIMO PRINCIPE AC DOMINO
DOMINO

GVILIELMO HENRICO

DVCE SAXONIAE, JULIAE, CLIVIAE, MONTIVM, ANGARIAE
ET WESTPHALLAE ET RELIQUA

IN ALMA SALANA

EX DECRETO ILLVSTRIS ICTORVM ORDINIS
PRAESIDE

VIRO ILLVSTRI ATQVE EXCELLENTISSIMO
DOMINO

CHRISTIANO WILDVOGELIO

DVCI SAXO-ISENACENSI A CONSILIIS INTIMIS
CVRIAE PROVINC. ASSESSORE GRAVISSIMO COLLEGIORVM IURIDI-
CORVM SENIORE ET ANTECESSORE

PATRONO ET PROMOTORE SVBMISSE SEMPER DEVENERANDO

PRO LICENTIA

SVM MOS IN VTROQVE IURE HONORES CAPESSENDI
SOLENNI ERVDITORVM EXAMINI SVBJICIT

JOHANNES CONRADVS FIRNHABER,

HAMBVRG.

D. JVNII. clō 15 cc xv. HORIS ANTE ET POMERIDIANIS.

J E N A E, LITERIS MULLERIANIS.



P R Æ F A T I O.



In mecum deliberavi, quodnam thema disputationi inaugurali, quæ secundum decretum celeberrimi in hac Academia ordinis juridici, haberi à me debet, elaborandum præcipue sumerem. Et illud quidem statim constitueram, experturum me vires in tali aliqua materia, quæ ex jure Hamburgensi desumpta esset: quam verò ex plurimis, quæ se offerebant, potissimum eligerem, incertus eram. Primum decreveram fere, de argumento aliquo ex jure tutelarum disputare; nam cum matri, tutelam liberorum suorum susceptræ, duo minimum contutores adjungantur, secundum *Part. III. Tit. 6. Art. 5.* tum sæpe quæstio incidit, utrum ab his contutoribus, qui *Assistentes* vulgò vocantur, eodem modo juramentum tutorium exigi possit, quam ab aliis, secundum *dict. Tit. Art. 14.* in utramque enim partem judicatum memini. Ve-

rum, ubi me ad pertractandam hanc sententiam applicui, statim graves aliquot difficultates oboriebantur, à quibus in peregrino loco, ubi nulla cum viris Juris nostri peritis colloquendi facultas datur, expediti me non posse animadverti. Placuit igitur præsens non injucunda, & valde utilis, sed nec adeo trita materia, de Domino à rei vindicatione excluso secundum Statuta Hamburgensia, cujus explicationem DEO juvante nunc aggrediar.

Thesis I.

*Civitates
Imperiales
habent
potestatem
legislatoriam.*

IN rubrica ipsa nihil magnopere, quod interpretatione egeat, invenio, nisi forte alicui stomachum moveat, quod *Statuta Hamburgensia* nominavi. Cur enim non potius dixi *Jus* aut *Leges*? nam urbibus Imperii liberis potestatem legislatariam competere, nemo hodie inficiatur. vid. Myler. ab Ehrenbach. de Statib. Imper. P. II. c. 39. §. 2. etsi alii aliter hujus potestatis fundamenta jacent, cum quidam ea ponant in superioritate territoriali, Zigler de jnr. Majestat. Lib. I. cap. 5. §. 17. Mev. ad Jus Lubecens. Quæst. pralim. 1. n. 39. quidam in verbis Constitutionum Imperii, Ordinat. Cameral. Part. I. Tit. 13. §. 1. & Tit. 57. Dn. Schvveder in Jur. Public. Part. Spec. Sect. 2. c. 13. quidam in exemplis Ordinationum provincialium, quæ passim typis publicata exstant, Beat. Hert. de Super. territorial. §. 25. quidam denique in usu longo, Illustris Dn. Thomaf. disput. de Stat. Imper. potestat. legislator. contra jus commune, §. 21. Quando igitur Juri Hamburgensi legum nomen proprie convenit, videri possem

*An jus
Hamburgense recte
vocetur
Statuta.*

sem injurius in *autovoular*, & jus propriis legibus vivendi, hujus illustris Reipublicæ: siquidem constat, statuta ea communiter dici, quæ à civitatibus municipalibus, non sine jussu & confirmatione domini territorialis, conduntur. vid. Coraf. *de Art. Jur. II. c. 15.* Sed ab hac objectione liberat me ipsa juri nostro præmissa præfatio, *in verbis*: *Bei Exequirung dieser Stadt uhralten Statuten / & paulo post*: in *Observirung solcher Statuten / & iterum*: *solche alte Statuta*; quamvis non diffitear, magis ad dignitatem Reipublicæ accommodatum esse titulum, qui fronti ipsius textus præfixus est, das *Hamburgische Stadt-Recht*. Nam ex illa altera & incongrua denominatione STATUTORUM, profluxit communis & perniciosus error, non tantum veterum, sed & complurium recentiorum Jurisconsultorum, qui docent, quod statuta in dubio interpretationem ex jure communi, seu Romano, passivam recipiant, & sic accipienda sint, ut jus commune quam minimum lædant: de qua opinione videatur instar omnium B. Ferdinandus Christophorus Harpprechtus, *P. II. Tractat. Academicor. de Success. p. 1105. num. 2. & 3.* Quem errorem non solum novi auctores explodunt, Dn. Thomaf. *dict. Disput. §. 77. Kressl. Spec. Jurisprud. in Prolegomen. §. 36. & Conradus Sincerus, seu Kulpisius, de Germanic. Leg. auctor. §. 55.* sed & jam olim castigavit David Mevius in *dedicatione Commentarii ad jus Lubecense*, his verbis: *Rectioris tramitis mihi hoc principium fuit apprehendisse, quod Lubecensis Jurisprudencia aliis suisque propriis ex fontibus magis, quam Romanis legibus baurienda esset; quod*

An Statuta interpretacionem recipiant ex jure Romano.

etiam spectant, quæ idem eodem loco, *Quæstione præliminar. I. num 57.* egregie differit: non levio- rem, inquiens, errorem illos errare existimo, qui ex Juris Civilis rationibus statutorum æquitatem examinant, quam qui ad eandem formam cuilibet ætati, sexui & corpori, crepidas calceosve conficiunt. Inserui autem hanc observationem ideo, quia in sequenti tractatione facile apparebit, quanto usui ea sit, in interpretatione tum juris patrii generatim, tum speciatim hujus capituli, in quo versamur, futura. Quando autem civitas nostra Hamburgum potestatem legislatariam acceperit, satis in obscuro est; nam neque Adamus Thraciger in *Chronic. Hamburg. MSct.* neque Cyriacus Spängenbergius, *Lib. 2. Chronic. Schauenburg. c. 7.* sed neque, qui hos refutavit, Petrus Lambecius, *Lib. 2. Origin. Jur. German. c. 28.* hanc quæstionem verè deciderunt, cum D. Vincentius Placcius, cujus apud nos super ea re conscripta commentaria asservantur, longè aliud demonstraverit. Sed nos hæc mittamus, quia magis sunt historici sori. Nunc ad rem ipsam.

Thef. II.

*Verba Statuti Ham-
burgensis.*

Et primum quidem ipsum Statutum repræsentabimus, ad quod commentatio nostra directa erit, *Part. II. Tit. 2. Art. 7.* Welcher Mann dem andern leihet sein Pferd / Kleid / oder was es für Gut sei / und auf wasserley er das aus seinen Gewehren läffet mit seinem Willen / und verkaufft es derjenige / der es in seinen Wehren hat / oder versetzt er daselbige / oder wird es ihm abgeraubet oder abgestohlen: So mag derjenige / der es erstlich verliehen oder versetzt hat / dar-
auf

auff wieder den Einhaber defelben / wofern derjenige
 folches mit gutem Titel an ſich gebracht / keine For-
 derung haben / ſondern muß ſich deswegen an den
 ſelben / welchem er es geliehen oder verſetzt hat / oder
 ſo derſelbige verſtorben / an deſſen Erben halten, An-
 notant ad hunc articulum Interpretes juris noſtri, Dn. *Esſe ex*
 Henricus Blockius, in diſputat. ad Jus Status. Ham- *jure Sa-*
 burg. Theſ. 47. qua eſt inter Lauterbachianas, Volum. *xomico.*
 2. Diſp. 5. viri item ampliffimi, graviffimique, Dn.
 Ericus Wördenhoff, & Dn. Nicolaus von der Gehr-
 Senatores, quorum notas mecum liberaliter commu-
 nicavit vir magnificus atque excellentiffimus, Dn. JO-
 HANNES ANTONIUS WINCKLERUS, Syndicus
 Reipublicæ Patriæ meritiſſimus, eiusque hoc tempo-
 re ad aulam cæſaream delegatus ſplendidiffimus,
 Patronus meus magnus, eum deſumtum eſſe ex Specu-
 lo Saxónico. Verum ex adverſo ſtat doctiffimus Jo-
 hannes Schilterus, Exercit. 25. ad ff. §. 6. & ſqq. qui
 textum Juris Saxónici negat huc trahi debere; de-
 quo ut ed melius judicari poſſit, primum apponam
 ipſa verba Speculi, Lib. 2. Land-Recht Art. 60. Wel-
 cher Mann einen andern leihet ſein Pferd / Kleid oder
 andre Fahrhaab / oder verſetzt / oder zu welcher Wei-
 ſe die aus ſeinen Gewehren mit ſeinem Willen kömmt/
 verkaufft ſie denn der / der ſie in Gewehren hat / oder
 verſetzt er ſie fürbaß / oder verſpielet ſie / oder aber
 abgeraubet / jener der ſie dieſen verliehen oder verſet-
 get hat / der mag deren keine Forderung haben / ſon-
 dern allein wieder den / dem der ſie leihe oder verſetzte.
 Jam quis non vider, eandem eſſe juris Saxónici, quæ
 Ham-

Hamburgensis, verba, eandemq; utrobique sententiam, nempe COMMODANTI NON DARI, RE PER COMMODATARIUM ALIENATA, ADVERSUS TERTIVM POSSESSOREM REI VINDICATIONEM. Et tamen Schilterus, vir de jure Germanicò optimè meritis, contrarium nobis persuadere, vult, dum ait, Jus Hamburgense non ex Jure Saxonico, sed ex erroneà ejus interpretatione fluxisse. Non enim in omnibus casibus Commodanti, rei vindicationem adversus tertium denegari putat, sed eò tantum casu, si pactum commodato adjectum sit, ut possessio & dominium revocabile transeat in Commodatarium, ut Commodans de periculo eò securior sit interea.

*Schilterus
refutat.*

Sed unicuique apparet, credo, explicationem istam nimis esse contortam, & maximè à sensu & simplicitate juris Saxonici alienam, ut animadvertit Leyserus *Collat. Jur. Saxon. & Roman. disp. 1. §. 46.* Nam variè emendat textum ipsum, ad quod remedium non nisi in extrema necessitate confugiendum erat, cum in vulgatis editionibus legatur, *oder zu welcher Weise die aus seinen Gewehren mit seinem Willen kömmt* / ipse ex duobus Codicibus manuscriptis scribi vult: *zu welcher Weise er die aus seinen Gewehren läffet mit jenes/recipientis commodatarii, Willen.* Sed cur quæso tam absurdam mentem juri Saxonico affingamus? an potest alicui quid commodari sine suo consensu? minime; non igitur opus fuit, ut illud specialiter moneretur. Et sive legas: *mit seinem Willen* / sive *mit jenes Willen* / quoad rem ipsam idem erit; nam hæc clausula nihil aliud ostendit, quam

quam quod hic agatur de illis casibus tantum, ubi
 mediante contractu, & sic utriusque voluntate, tam
 Commodantis, quam Commodatarii, possessio
 naturalis in alterum transfertur, ut sic excludatur ille
 casus, quando absque interventu utriusque voluntatis,
 res ad alium pervenit. Stryck. *Vf. Mod. ad Tit. II
 Commodat. §. 7.* Taceo, quod coeteræ Schilteri in-
 terpolationes tam longe quæsitæ sint, ut nullo modo
 cum textu componi queant. Præterea magnam opi-
 nionem veritatis nostro juri conciliat jus Suevicum, *Consensu
 aliorum
 jurium.* Lubecense & Culmense, in quibus eodem modò con-
 stitutum est, ut si quis rem alicui commodaverit, &
 postmodum fiat, ut Commodatarius rem sibi con-
 creditam alienet, vel quocumque modo distrahat, de-
 negata sit domino rei vindicatio adversus possesso-
 rem; & personalis tantum commodati actio ipsi salva
 maneat adversus commodatarium, adeoque non pos-
 sit convenire commodatæ rei possessorem, sed tan-
 tum commodatarium, cum quo contraxit ab initio,
 vel eo non amplius superstiti, heredes ejus. Ap-
 ponam ipsos textus. In speculo suevico ita disponi-
 tur: *Welch mann ein Pferd/ oder ein Gewant/ o-
 der ander fahrendes Gut sezt oder leihet mit seinem
 Willen/ so hat jener recht daran/ in des Gewalt
 es kömmt/ cap. 226.* Mutilum esse locum Schiltero
 concedo: sed tamen, quid velit, claret. Jus Lube-
 cense ita habet, *lib. 3. Tit. 2. Art. 1.* Was ein Mann
 dem andern lehnet/ das soll er ihm unverdorben wie-
 der geben/ oder bezahlen nach seiner Würde/ wann
 es verlohren wäre, verkauffte/ vergebe/ versezt/
 B oder

oder alienirte / Er aber das gelehnte Gut / es sei welche Hand es wolle / so hat der Commodans oder Aufleiher / keine Ansprach wieder diejenigen / welchen es verkauft / vergeben oder versezt worden / sondern muß bei seinem Mann dem Commodatario, oder bei seinen Erben auf des Todes-Fall bleiben : der Hand muß Hand wahren : & in fine Articuli sequentis additur : do jemand seinen Glauben gelassen / do muß er ihn wieder suchen. Juris autem Culmen-
 sis, lib. 3. tit. 5. cap. 1. verba ita sonant : Wenn jemand sein Gut einem andern leihet / versezt / oder vertrauet / und darüber zur Verwaltung sezt / derselbe aber solches einem andern wieder versezt / oder anderer Gestalt wieder veräußert / so mag der Herr die Forderung an niemand anders haben / als an denen Versohnen / welchen er sein Gut geliehen / versezt und vertrauet hat. Vid. plura apud Stryck. *Uf. mod. ad tit. ff. de Rei Vindicat.* §. 8. & Hert. *lib. 1. parocem.* 18. Et in Batavia sua testatur Iohannes Voet in *Comment. ad Tit. ff. de Rei Vindic. num.* 7. cum multis aliis ibi citatis, hanc ferè consuetudinem obtinere, ut mensam foenebrei exercentes, bona fide tuto accipiant pignori res furto subductas, non nisi pretio reddito easdem dominis suis restituri, & ut certo tempore, certoque diei-um vel hebdomadarum spatio aurifabri ac veteramenta-rij, res sibi venum oblatas ipsi venales publicè exponant, eoque lapso sic tuto emant, ut non nisi pretio re-
 fusu vindicationem pati teneantur. Remota est prima juri nostro a Schiltero imputata absurditas ; Se-quitur altera : Ait enim Schilterus *d. l. §. 8.* contra-
 dictioni

Nam oc-
 currat con-
 tradictio
 in Statuto?

ditioni textum Statutorum Hamburgensium implicari. Cum enim dixisset de recipiente rem, verbi causa, commodatum, oder wird es ihm abgeraubet oder abgestohlen/ mox adjici limitationem: *wosfern derjenige solches mit gutem Titul an sich gebracht*: qua limitatione tolli priora verba, cum simul subsistere, nequeant. Verum, ut ingenue fatear, nescio plane, an Dn. Schilterus affectu aliquo adversus conditores Statutorum nostrorum abreptus, utrum vero in elaboranda exercitatione ista aliquid humani passus fuerit, aut non potuerit videre, contingere posse, utres mihi furto vel rapina ablata, ad tertium aliquem bona fide perveniat. Quid enim si fur, vel ejus mandatarius eam in foro venalem proposuerit, nonne fieri facillime potest, ut eam tertius fraudis minime conscius emat, adeoque justo titulo sibi acquirat. Tantum de Schilteri argutationibus.

Thef. III.

Illud omnes fatentur, articulum nostrum ita, ut *Statutum nostrum* diximus, explicatum, juri civili Romano non convenire. Eo enim jure communis omnium actionum in rem lex est, ut sint adversus eum, qui rem, de qua agitur, possidet. *l. 25. ff. de oblig. & action. l. 36. ff. de rei vindic.* Hinc in *l. un. C. de alienat. mutand. judic. caus. fact.* dicitur, quod possessio actionem in rem pariat adversario; quod nihil aliud est, quam possessionem ejus, qui rem possidet, hoc prestare adversario id est, petitori, qui rem vindicat, ut cum possessore in rem agi possit, seu possessionem causam esse, quæ vindicanti actionem in rem tribuat adversus possessor.

rem. *L. 9. ff. de rei vindic.* vid. Donellus *Lib. XX. Comment. Jur. Civil. cap. 3.* & Wesembec. *Paratitl. ad tit. ff. de rei vindic. num. 4.* Atque nihil hic interest, quocunque titulo quis possideat, sive iusto sive iniusto. Omnis enim possessor ex æquo rei vindicatione tenetur. De malæ fidei quidem possessore nullum est dubium; nam si quis rem, quam furtivam esse agnoscit, prius reddere nolit, quam pretium a domino solutum sit, rem incivilem desiderat, secundum pronuntiatum Imperatorum Severi & Antonini, in *l. 2. C. de furt.* imo, ut ipsi addunt, in criminis suspicionem incidit. Neque aliud dici debet de bonæ fidei possessore: ut ecce, si mater tua fundum tuum invito, vel ignorante te vendidit, tu tamen cum a possessore vindicare, etiam non oblato pretio, potes. *L. 3. & L. 23. C. de Rei vindic. & L. 16. ff. de Eviction.* Imo, si quis rem alienam, exempli gratia, furtivam, bona fide comparaverit, & rursus bona fide ante interpellationem domini in alium transtulerit, dominus contra eum habet actionem, non quidem rei vindicationem, tamen ex æquitate actionem in factum, quæ ejusmodi venditor ad id tenetur, quod ex ista venditione lucratus est, seu quod ultra pretium, quod ipse exsolvit, consecutus est. *arg. l. 52. ff. de rei vindic. l. 32. ff. de rebus creditis. l. 106. ff. de Reg. Jur.* secundum quam sententiam responsum est a Facultate Juridica Wittembergenſi, ao. 1647. his verbis: daß die distrahirte Sachen von denen / so dieselben / mit was Titul es auch sei / an sich gebracht / und nochmahls als in ihrer Verwahrſam haben / abzufordern / und dem von D. wieder

der zuzustellen: im Fall aber eines und das andre
 allbereits von denen Besigern veräußert / seind diese-
 nigen / so wißentlich etwas vom Raube und Abnahm
 gekauft oder sonst erlanget / den rechten Werth desel-
 ben / die andern aber / denen von dem vicio nichts wiß-
 send gewesen / so viel sie lucriret / zu erstatten schuldig.
 Vid. Struv. *Syntagm. jur. civil. exercit. XI Thes. 13.*
 Hert. *lib. 1. paroem. 17. §. 4.* Speciatim quod rem com-
 modatam vindicare dominus a quocunque possessor-
 re Jure Romano possit, recte ex argumentis *L. 8. §.*
9. ff. Commod. §. 1. 9. ff. de rei Vindic. concluditur. Adde
§. 16. Instit. de oblig. qua ex del. nasc. ubi statuitur,
 si commodatario res surrepta sit, dominum rei com-
 modatae, vel adversus commodatarium actione com-
 modati experiri posse, vel adversus furem actione
 furti. *L. f. C. de furt.* Sic etiam, si res oppignorata
 non sit creditori tradita, sed a debitore retenta, & ab
 eo hac occasione contra pactum alienata, subsistit
 quidem alienatio, sed cum suo onere, *L. un. C. rem*
alienam gerent. non intend. xcr. §. par. alienat. hoc est
 ita, ut creditor jus pignoris saluum retineat, *L. 12. C.*
de distr. pignor. Dn. Block. *cit. dissert. ad Ius Satul.*
Hamburg. §. 51. & hypothecaria actione adversus no-
 vum emtorem sibi consulere possit.

Thes. IV.

Itaque Juri Civili jus nostrum hac in parte con-
 tradicit: & hinc exorta sunt controversiae de ejus
 rationabilitate. Olim enim firmiter sibi & alijs Juris-
 consulti persuadebant, Jus Civile nihil aliud esse,
 quam naturalem rationem, moribus & literis expli-
 catam;

catam; huic consequens erat, ut omnia jura Germanica, Romanis contraria, tanquam iniquissima traducerent. Exempli gratia, jure Justiniano, *Novell. 118. cap. 3.* quod Imperator Carolus V. in *Rec. Wormalienſe de 10. 1521. §.* doch hat unſer Dheim ic. approbavit, introductum est jus repræſentationis in linea collateralis, cujus vigore fratrum ſorumque prædeſunctorum liberi ad hereditatem demortui ſui patris, una cum patris adhuc viventibus, vocantur, vid. Boehmer. *poſſit. de Suceſſ. ab inteſt. cap. 4. membr. 1. §. 3.* ulterius autem hoc jus repræſentationis non producit, ut ſatis emphatice in dicta *Novella* declaratur. Add. Rittershuſ. *ad Novell. Part. 7. cap. 13. n. 6.* De jure Saxónico autem non attenditur hoc jus repræſentationis. Berlich. *Part. 3. conſul. practica. 24. n. 17. ſqq.* Stryck. *Vf. Mod. ad tit. ff. de Legib. §. 6.* Hanc conſtitutionem juris Saxónici ab Electore Auguſto, *Part. 3. Conſt. 18. §. ult.* poſt edictum Caroli V. denuo confirmatam, nihilo minus inter ipſos jurisconſultos Saxónicos Colerus *Dec. 48. n. 9. ſqq.* iniquiſſimam vocat, nulla de cauſa aliâ, quam quia aliud invenerat in jure Romano. Nam ſi iniquum non eſt, nepotes fratrum excludi a propatris, quod fit jure Romano, non video, quomodo iniquum ſit, liberos fratrum excludi a patris, quod fit jure Germanico. Diſtancia certe unius in conſanguinitate gradus, juſtitiam rei hujus non alterabit. Sed eo dilabuntur homines præjudicio autoritatis decepti. Idem plane fatum noſtri diſpoſitio juris experta eſt. Nam cum juris conſul Saxónici eam defendere debuiffent, hi tamen primi fuerunt, qui

Anju Germanicum, Romano contra-rium, ſtatim hoc i-ppo pro ir-rationabili ſit habendum? quod illuſtratur exemplo Suceſſio-nis ab in-veſtato.

Saxónici Juricon-ſulti Saru-um noſtrum pro irrationabili habent

eam reprehenderunt, ut videre licet ex deciso, quod apud Zobelium, *Part. 2. diff. 22. n. 14.* reperitur, ubi expresse præter alia dicitur. So haltens doch die Schöppen Stühle in diesem einig / daß in Practica auf dieses unbillige Recht nicht zu sprechen; si quæras, quare sit injustum hoc jus, statim respondetur apud Besoldum in *Pract. Thes. voce Gewohnheit* in *addit.* quia reclamatur textus expressus in *L. 2. C. de furt. & serv. corrupt.* quasi vero nihil justum sit, nisi quod Romanis tale visum est, cætera omnia sint injusta. Et tamen eandem fovent sententiam Carpzovius, *Part. II. cap. 26. d. 5. n. 5.* illustris Bergerus, in *Oeconom. Jur. lib. 3. tit. 2. §. 6.* & Dn. Leyserus *diff. 1. Collat. jur. Saxon. & Roman. Thesi. 46.* Zobelius & Carpzovius ad irrationabilitatem juris nostri demonstrandam, utuntur hoc argumento; quod contractus & actus agentium non debeant aliquid operari ultra mentem & intentionem contrahentium. *L. 19. ff. de reb. credit.* Sed hoc brocardicum prorsus huc applicari non potest. Eo enim nihil aliud significatur, quam hoc, si aliquando incidat controversia, quid hoc vel illo contractu intenderint contrahentes, tum non debere pactum ultra cogitata extendi; Igitur hoc brocardicum non possumus usurpare contra tertium, cum quo nihil contraximus, sed tantum adversus contrahentem: Dn. Leyserus autem addit, pugnare pro Zobelii sententia generalem juris naturæ regulam, quæ, nemini dominium rei suæ sine voluntate & culpa ipsius auferre jubeat. Sed etsi commodantis spontanea voluntas in hoc casu non adsit, concurrit tamen ejus factum, ex eoque præsumta volun-

10

Qui refuta-
tantur.

voluntas. Nempe non omnino impossibile fuit commodanti praevidere, contingere posse, ut commodatarius rem alienet; dum autem hoc non obstante commodavit, & fidei Commodatarii tantum tribuit, quodammodo consensit in futuram alienationem, & consequenter etiam in exclusam vindicandi potestatem.

Thef. V.

*Afferitur
rationabi-
litas Sta-
tuti.*

*non qui-
dem pri-
marie
propter
utilitatem
commerci-
orum.*

Refutatis objectionibus, nunc alia argumenta proferenda sunt, quibus Statutum nostrum ab injustitia liberetur. Suscepit defensionem ejus Mevius, in *Comment. ad Jus Lubecens. Part. III. tit. 2. Art. 1. §. 2.* ex hac potissimum ratione, quia consulat commerciorum utilitati; absterrebuntur enim homines ab emendo; si metuant, ne post interjectum aliquod tempus, cum jam venditoris copia, adeoque regressus contra eum, haberi non amplius potest, tertius quidam adveniat, & rem tanquam suam vindicet. Et meruit hæc Mevii ratio applausum non vulgarem, cum eam secuti sint Esbachius *ad Carpzovium p. 2. c. 26. d. 5.* Hertius. *Lib. 1. paroen. 18.* Hoppius. *ad §. 2. Instit. tit. 2. M. R. C. O. in usubodiern.* & anno 1698. prolixius explicaverit Iohannes Amstel / Professor Regiomontanus, peculiari dissertatione, cui titulus: *Rationabilitas Canonis Juris Lubecensis*; *Hand muß Hand wahren*; imo iam ante in ipsis Statutis nostris, *Part. II. tit. 4. Art. 2. verb.* Zu beförderung gemeiner Handthirung/ reperitur. Sed ea ratio improbat ab Antonio Matthæi in *paroen. Belg. 7. p. 224.* ait enim, commodatum non pertinere ad negotiationem; quod verum quidem est; interim tamen venditio a Commodatario

ratio facta ad negotiationem pertinet, ut adeo ne-
 sciam, quare hæc dubitatio contra superiorem senten-
 tiam prolata sit. Ego vero lubens quidem concedo,
 rationem Mevii hodie non ineptè adduci ad iustifi-
 candum Statutum nostrum, quia minè quam maxime
 urbs commerciis floret, illisque unice sua incremen-
 ta debet. At, si de origine hujus antiquissimi juris qua-
 situr, tum vereor, ne hæc ratio sufficiens sit; nam illo
 tempore nondum adeo Germania exportandis suis, &
 importandis alienis mercibus occupabatur. Malim igitur
 cum B. Georgio Beyero. *Posit. ad tit. ff. commod. p. 282. sta-* *Sed prop-*
tuere, hanc regulam natales debere fidei antiquæ Germa- *ter confer-*
nica, ut magis contra intercipientem, quam bona fide *vationem*
accipientem agatur. Semper enim Germani bonam fidem *fidei.*
tanti fecerunt, quanti alia natio nulla, nulloque in casu
salva existimatione ab ea recedi posse, putarunt, de quo
latius Hertius lib. 1. par. 8. Eteo me ducit ipsum,
jus Lubecense, quod Lib. 3. tit. 2. Art. 2. unumquem-
que jubet diligenter dispicere, cui rem suam com-
modet, his verbis: Ein jeder sehe wohl zu / wem er
das Seine aufleihet: ejusque rei adjicit deinde ge-
neralem rationem, do jemand seinen Glauben gelas-
sen / do muß er ihn wieder suchen / id est, cujus semel
quis fidem secutus est, res suas ei tradendo, cum in
repetitione hujus rei sequi, seu convenire necesse
est. Hæc igitur ratio, non autem utilitas commer-
ciorum, vera & primaria juris hujus introducti causa
est: hæc etiam ratio ab omni iniquitate Constitutio-
nem nostram liberat. Nam, ut ipse Mevius ad Jus
Lubecens. d. art. recte argumentatur, quem sua volun-

tace quis accepit debitorem, eo contentus esse debet.
L. 10. §. 1. ff. Qui satisd. cogant. quia eum admittendo
 probavit. *L. 3. ff. de fidejussor.* Si fides fallitur, suae fa-
 cilitati imputare debet, quod meliorem non elegerit.
L. 1. §. 10. ff. de separat. Eodem tendit & altera ratio,
 quae in jure Lubecensi, *d. Lib. 3. Tit. 2. Art. 1.* propo-
 nitur per notissimum Canonem: *Hand muß Hand*
wahren. Repugnat enim contextui & toti compagi
 juris Germanici illa hujus Canonis interpretatio, quam
 dedit olim Syndicus quidam Gedanensis, quaeque pro-
 fertur in disputatione *de abusu Canonis Lubecensis*.
Hand muß Hand wahren, habita Gedani 1707. sub
 praesidio doctissimi Willenbergii, *thes. 5. pag. 16.* hoc
 modo: *diese Regel ist zu verstehen / in rebus vitio ali-*
quo affectis, dann da muß Hand Hand gewehren / das
ist / tin jeder muß seinen Gewehrs-Mann stellen / so er
extra culpam sein will / damit den eigentlich überein-
stimmet. *L. 5. C. de furt.*

Theol. VI.

In ipso jure Neque abhorret a jure Civili, ut is, qui rei ali-
 cuius *causa sine qua non* est, in culpa tamen esse in-
 telligatur. Huc pertinet, quod scriptum est in *L. 23. §.*
4. ff. loc. cond. culpaë conductoris annuerari, si
 propter inimicitias ejus vicinus arbores exciderit, igitur,
 etiam si conductor nesciit, alterum sibi insidiari,
 tamen quia ejus causa damnum datum est, ipsi potius,
 quam locatori, hoc nocere debet. Sic in contractu
 assinatorio quoque accidit, ut si ego propolae cuidam
 rem vendendam dederim, ipse eam oppignoraverit,
 pecu-

pecuniamque indereductam in suos usus convertere,
cessat rei vindicatio contra tertium possessorem, sola-
que actio personalis contra propolam, nempe actio
prescriptis verbis, obtinet; de quo latissime Boehme-
rus in *disputatione de translatione domini in contractu*
affirmatorio §. 1. §. 99. ubi exhibet Responsum Facul-
tatis Iudiciz Hallensis, 20. 1701. Mense Augusto, super
ea re datum. Add. Laurerbach. *de contract. innomi-*
nam §. 1. §. 99. Qua de causa & nulla de alia,
quam quia fidem propolz secutus est. Sic pariter
feres habet in magistris societatis, qui olim frequen-
ter constituebantur. vid. Sigon. *lib. 2. de jur. antiq.*
ord. Roman. cap. 4. Nam si plures socii unum de suo
ordine societati praeferint, tenentur ipsi in solidum
propter omnes contractus, quos magister ille intuitu
ac nomine societatis iniit. *L. 67. pr. ff. pro. Soc.* Idem
fit in actione Exercitoria, *L. 1. §. f. L. 2. L. 4. §. 1. ff. de*
Exercit. Act. & Institoria, *L. 13. §. ult. & l. 14. de instit.*
Act. Cum igitur ipsi Romani in his negotiis aliam
rationem allegare non possint, quam eam, quae antea
a nobis reddita est, quid impediatur, quo minus nos
ea in materia commodati utamur? Verum quidem
est, quod dolus alienus mihi nocere non debeat, *L.*
74. §. 1. ff. de reg. iur. Interim si quizeris, an
ame, qui rem melius cognoscere, & explorare, debui,
utrum ab altero, qui plane culpa omni vacat, da-
mam ferri debeat, facile patet, prius affirmandum
esse. Hoc autem contingit in casu Statuti nostri. Com-
modavi Cajo vestem, hanc ille vendidit Mevio; De-
bui omnino prius inquirere in Caji vitam & mores.

Aliud ar-
gumentum
pro ratio-
nabilitate
Statuti.

an sit talis, cui res pretiosa tuto committi queat; quod dum non feci, neglexi scire, quod scire potui, c. 15. Diff. 37. ideoque non excusor.

Thef. VII.

In Statu-
to requi-
ritur, ut
tertius sit
possessor
b. f.

Nunc videndum est, in quibus casibus obtineat regula Statuti nostri, quod nempe dominus sit exclusus a potestate rem vindicandi, neque contra tertium possessorem agere ipsi liceat. Et primum quidem (1.) requiritur, ut tertius bona fide rem acquisiverit, *verb.* Wieder den Einhaber desselben / wosern derselbe solche mit gutem Titel an sich gebracht. Itaque si tertius sciverit, rem in se translata non fuisse auctoris sui, sed commodantis, tunc commodans rem alteri commodatam a tertio male fidei possessore consequi potest, per actionem rei vindicatoriam, ut annotavit ad Statutum nostrum Dn. Vincentius Müllerus, Consul olim Reip. Hamb. Clariss. narratque Matthias Colerus in *decis. German. P. 1. decis. 7. m. 8. §. 2.* ita Lipsiensis de jure respondisse cuidam mercatori Silesio. Et merito quidem; dolus enim suus nemini prodesse debet: *L. l. de dol. mal. §. met. except.* Stryck. *Uf. Modern. ff. Tit. Commod. §. 8.* Bene autem notandum est, de quo loquatur Statutum, quia jam supra thes. monuimus, quod Schilterus contradictionis Statutum incuset, quia in præcedentibus dicitur, hoc obtinere etiamsi res furto ablata sit, *in verbis.* oder wird es ihm geraubet / oder abgestohlen; & tamen requiri, ut possessor sit bonæ fidei, hujusmodi autem furem non esse. Repeto enim superiorem responsionem, adversus

Jus furem ipsum posse rei vindicationem institui, sed non adversus eum, qui bona fide emit a fure. In quo tamen lubens fateor, jus nostrum iterum a Jure Civili abire; secundum jus civile enim vitium furti ita rem afficit, ut comitetur quemcunque, sive bonæ sive male fidei possessorem, neque vindicans pretium rei eorum alicui restituere teneatur. L. 3. & 23. C. de rei vindic. L. 2. C. de furt. Deinde (2.) notandum est, hæc Statutum nostrum non tantum in foro mercatorum, sed ubicunque obtinere, propter verba generalia, *welcher Mann/quæ* restringi ad solos mercatores sana ratio non patitur. Est quidem in contraria opinione Johannes Marquardus, Lib. 2. de jur. mercat. cap. 9. n. 1. eumque sequitur autor citatæ in fine theses quarte dissertationis, sub præsidio Willenbergii habitæ, qui pag. 18. ut sententia, ejus tanto rectius percipiatur, sequenti exemplo rem illustrat: Si futor, (commodatarius) poculum argenteum commodati nomine acciperet a sartore, (commodante) ut illo in festivitate nuptialis filie suæ uteretur, postea vero futor hic (commodatarius) poculum illud apud Patricium Lubecensem, non mercatorem, sed literatum, oppignoraret, absurdum esset, sartori denegare vindicationem poculi sui. Sed non moror dissensum Marquardi, vel hujus auctoris, quia nititur duabus hypothësis aperte falsis: quarum prior est, quod hic canon sit contra jus commune, adeoque ita explicandus, ut illud quàm minime lædat; posterior, quod tantum in utilitatem commerciorum sit repertum. Sed quemadmodum hæc posterior in thess. cit. refutata, ita prior ab hodiernis Practicis fere commu-

*Differen-
ria Juris
Civilis &
Hambur-
gensis cir-
ca rem
furtivam.]*

*Statutum
non obti-
net tan-
tum in fo-
ro merca-
torum, sed
ubique.*

*Statutum
est in
Hambur-
ga, unde
statu-
to ubi*

20010

niter, & rectissime quidem, rejicitur, qui docent, jus Romanum tantum esse subsidium, vid. Tit. *Observationes* ratiocinanti. in *Lauterbach. Obs. 2.* & J. C. Heydelmann in *diatrib. de recept. jur. Roman. Sect. 2. §. 5.* Ergo ante omnia Statuta loci ac leges provinciales ad decidendas controversias forenses, tanquam jus principale, adhibenda sunt: in quibus, si quæ obscuritas subnascitur, interpretatio facienda est ex principiis propriis, hoc est, ex sana ratione & constitutione Reipublicæ defunctis, non autem ex principiis juris Romani, utpote cui tunc demum locus est, ubi aliquid non est in Ordinationibus provincialibus definitum, vid. Stryck. *discurs. preliminar. ad Us. Modern. §. 371. seqq.* Nummum ergo manet, non posse Statutum ad mercatores restringi, præcipue cum tempore conditi hujus juris, commercia nondum adeo floruerint.

Thesi. VIII.

Statutum non in solo commodato obstat.

Tertio autem (3) & potissimum quidem illud perpendendum est, an hoc jus in solo contractu commodati obtineat, an vero pertineat ad contractus etiam alios. Et quidem in Jure Lubecensi videtur canon ille, *Hand muß Hand wahren* restringi ad solum commodatum, & comprobatur Marquardus, *Lib. 2. de Jur. Mercat. cap. 8. num. 88.* præjudicatis Senatus Lubecensis, cum in deposito, verbi gratia, non observari. Sed jure nostro Hamburgensi aliud dicendum esse prorsus patet, propter verba: *Und auf wasserley Weise er das aus seinen Gewehren läffet mit seinem Willen*, quæ ad unam speciem applicari se non patiuntur, & ex quibus

quibus verbis apparet, principium Statuti: *Welcher Mann dem andern leihet*: non esse exclusive intelligendum, sed commodatum tantum exempli loco apponi, quod etiam animadvertit Angelusimus Dn. Ericus Wroedenhoff, in *Notis ad Statutum nostrum*. Neque ideo, quod hic articulus sub titulo *de commo-* *An a rubrica argu- mentum firmum duci possit?* *dato* positus est, recte dicitur, ad illud etiam restringi debere; Per *rubrum* enim speciale non potest *nigrum* generale restringi; Et quemadmodum non creditur referenti, nisi de relato constet, *Auth. Si quis in alio quo. C. de edend. Matcard. de probat. Volum. 2. Conclus. 923. Goeddeus de contrabenda & commistenda stipulatione, cap. 1. num. 5.* ita, si in titulo minus sit, in subjecto capite plus, nihil ex titulo inferri potest. vid. *Vigl. Zuichem. ad L. v. ff. de reb. credit. num. 16.* Idem mecum sensisse videtur Magnificus Dn. Vincentius Garmers, cum sententiam Statuti nostri, in *Not. ad Part. 2. Tit. 4. Art. 2.* his generalibus verbis exprimit: *Wann der Herr einem ein Pferd leihet/ oder sonst aus seinen Wehren lasset/ und der es in Wehren hat/ es verkaufft/ versetzt/ oder wann es dem abgestohlen wird/ so kan der Herr wider den nicht agiren/ der es bono titulo an sich gebracht/ sondern muß sich an dem halten/ dem er die Wehrung anvertraut.*

Thef. IX.

Cum autem dicatur in Statuto, *quocunque quis Statutum modo rem voluntarie dimittat*, necessarium est, ut illo- *obtinere in-* *rum* modorum primarios spectatim recenseamus. Et pignore rei *mobili-* *primum* quidem expresse Statuta nostra idem obser-

vari volunt in pignore rei mobilis. Verba ita sonant
in Part. 2. Tit. 4. Art. 2. Wann ein Gläubiger in sei-
 nes Schuldners beweglichem Guth Verpfändung hat/
 und ihm doch dasselbe in seinen Gewehr gelassen/
 der Schuldner aber inmittelst/ ehe dann der Zahlungs-
 Termin kommen/ solche verpfändete Waare verhandelt/
 oder in andere Hände gebracht/ so wollen Wir/ daß
 auf den Fall/ zu Beförderung gemeiner Handthierung
 und Vermeidung beschwerlicher Disputation; der Gläu-
 biger die verpfändete bewegliche Güter von denen
 Personen/ die sie mit gutem Glauben und richtiger
 Ankunfft erlanget/ wiederum abzufördern nicht befugt
 seyn solle. *Ex admonitione Centumvirorum hunc*
articulum contra ius commune approbatum scribit
Straccha, de Decolorib. Part. ult. num. ii. nam cum
 ius commune mercatoribus durum hic videatur, ideo
 posteriorem Creditorem hoc casu, cum res tradita est,
 priorem faciunt. Et Amplissimus Dn. Ericus Wær-
 denhoff *ad Part. 2. Tit. 4. Art. 2.* monet, ita pronun-
 ciatum esse anno 1519. in vigilia Martini, in superiori
 iudicio: Diemeil Arend Paulsen die Pfänder M. Hans
 Gendt überliefert/ so wäre er näher dabey zu bleibeff/
 als die andern Creditores ihn abzugewinnen: was sie
 aber besser/ soll restituiert werden. Pariter Magnific. Dn.
 Vincentius Müllerus quoque *ad eund. Art.* aliud præju-
 dicium profert, in causa appellationis Henrici Brüssers
 & Nicolai Hilder appellantium, contra Creditores Post/
 17. Dec. anno 1611. Daß Heinrich Brüsser/ weil er die
 verpfändete Ochsen in seiner Gewehr gehabt/ und die
 daraus geldsete 1000. Mk. in Händen/in denen bey sich
 haben

*idque pro-
 batur pra-
 iudiciis,*

habenden 1000. Ml. denen andern Gläubigern zu
präferiren. Et Mevius *ad Jus Lubecense*, Part. III.
Tit. 2. Art. 2. commemorat, cum tutor ex arca tute-
lari, in qua res pupilli conservabantur, inscijs contu-
toribus chirographum desumptum alii suo nomine op-
pignorasset, creditorem bona fide accipientem ab his
conventum in judicio Lubecæ fuisse absolutum, refer-
vata contra tutorem oppignorantem actione. Neque
profecto iniquum est, si debitor rem mihi oppignora-
tam me volente retinuit in sua potestate, deinde vero
eam iusto pignoris vel emtionis titulo in alium transtu-
lit, ut hujus novi possessoris possessio confirmetur, ego
vero ejus, quem semel elegi, fidem sequi cogar. Non
autem prætereundum esse duco, quod etsi novum
emtorem, verbi gratia, in possessione tueatur Statu-
tum nostrum, perimatque adeo jus hypothecæ alteri
competens, tamen si res oppignorata, quæ venditur,
sit servituti alicui obnoxia, ea non interire, sed ad no-
vum possessorem transire videatur. Nam creditori
quidem objici potest, quod fidem debitoris sui, quem
elegerit, sequi debeat: domino autem prædii domi-
nantis nihil vitio dari potest, quia is plane non est his
implicitus. Itaque placet mihi hic illud axioma Juris
Civilis, rem transire cum sua causa, præterquam si ali-
quid nominatim sit constitutum. *L. 67. ff. de contr.
emt. vendit.* Beyer. *ad tit. ff. de usur. posit. 48.* Jam
nominatim quidem constitutum est, quod jus pignoris
non transeat, sed de servitute altum est silentium, ne-
que ratio juris ad hunc casum quadrat, ut dixi. Illud

*An vi Sta-
tuti etiam
servitus
rei oppi-
gnorate
perima-
tur, aque
ut pignus
ipsius?*

*An vi Sta-
tuti possit
excludi per*

D

prospi-

clausulam ipicere sibi creditor adversus fraudem debitoris ejus-
constitui modi queat, ita ut vi ejus clausulæ habeat salvam per-
possessorii? secutionem hypothecæ adversus tertium? Sunt, qui
putant, id effici posse per clausulam constitui posses-
sorii. Chassan. *ad consuetud. Burgund. Tit. 5.* Christin.
ad Statut. Mechliniense. Tit. 7. §. 8. nam in tali casu cre-
ditor remediis possessoriiis uti, & mandatum manute-
nentię impetrare potest in bonis hypothecatis. Stryck.
de Cautel. Contract. Sect. 1. cap. 5. §. 24. Anton. Faber
in Cod. Sabaud. lib. 7. tit. 7. def. XI. Georg. Werner.
de jur. constitut. possessor. thes. 15. At me alio vocat
tum generalis ratio juris nostri, da einer seinen Glau-
ben gelassen / da muß er ihn wieder suchen / tum illa
specialis in hoc articulo contenta, zu Vermeidung be-
schwerlicher Disputation. Ultraque enim commentio
constituti possessorii obstat: prior ideo, quia & hic
mihi objici potest, me fidem constitutarii secutum esse;
posterior ideo, quia hoc casu multo magis difficiles
disputationes oriuntur, super vi & potestate constitui
possessorii, quæ cessant, ubi constitutum nullius est ef-
fectus. Cœterum si bona immobilia sint, aliud dispo-
nitur: In unbeweglichen Gütern aber / ita porro so-
nant verba, soll dem Gläubiger sich an die verpfändete
Güter / unangesehen / daß sie in andere Hände trans-
feriret / wosfern die rechtliche Bewehr / oder præscription,
darüber nicht verfloßen / zu halten unbenommen seyn.
Scilicet hic facilius ex tor explorare potest, quænam
conditio bonorum venditorum sit: nam cum jure no-
stro immensa fere privilegia sint hypothecæ judicialis,
Part. II. Tit. 5. Art. 1. 7. & 12, probabile est, homines
pruden-

*Statutum
non obti-
net in hy-
potheca
rei immo-
bilis.*

prudentes non facile aliquid alicui mutuum daturus, nisi bona sua immobilia coram iudicio hypotheca sup-
pofuerit. Si autem hoc factum est, jam novus emtor
ex assessoribus & actuariis iudicii nullo negotio pote-
rit intelligere, sintne hæc bona hypothecata, an
minus.

Thef. X.

Offert hic sese adhuc alia, quæstio non in-
digna, quæ decidatur, scilicet hæc, an locus sit Sta-
tuto nostro in hypotheca tacita, qua debitoris bo-
na creditori obligantur, non per conventionem vo-
luntariam, sed per iurisdictionem aut præsumptionem legis?
Lex enim ad hypothecam legalem inducendam requi-
ritur. *L. 1. C. commun. de legat.* Ego puto, Statutum
tantum loqui de hypotheca expressa; ita enim ver-
ba habent: *Wenn ein Gläubiger in seines Schuld-
ners beweglichem Gut Verpfändung hat / und ihm
doch dasselbe in seinen Gewehren gelassen.* Hæc verba
sunt ejusmodi, ut ad hypothecam tacitam trahi posse
non videantur. Nam in hypotheca tacita semper res,
quæ obligata est, in potestate debitoris manet, ut adeo
imprudenter fecissent legislatores nostri, si hypotheca
tacita talem conditionem adjecissent, quæ ipsi jam in-
est sua natura. Sed supersunt & alia argumenta, quæ
negativam decisionem hujus quæstionis persuadent.
Primum (1) est, quia, si Statutum ad hypothecam taci-
tam produceretur, ea hypotheca tota, inanis & irrita
redderetur. Ecce, fisco data est hypotheca talis in
bonis administratorum, *L. 1. C. de jur. fisc.* ut & eorum,
quibuscum contraxit, *L. 2. C. in quib. caus. pign. tac.*

contrab. Argum. *L. 8. ff. qui potior. in pignor.* nec non in bonis civium pro tributis, ac censu, *L. 7. ff. de Publican.* Pupillis ac minoribus data est talis hypotheca in bonis tutorum, ac curatorum. *L. 20. C. de off. administrat. tut.* Mulieri quoque data est talis hypotheca in bonis mariti, tam pro dote ipsa, quam ejus augmento, *L. un. §. 1. C. de rei uxor. act.* data est aliis quoque. Jam ponamus, debitoris fiscalis, tutoris, mariti, substantiam maxima ex parte consistere in bonis mobilibus, de quibus Statutum nostrum tantum loquitur; nonne si illi sua bona vendiderint, hypothecæ nullius erunt effectus, si Statutum ad hunc casum extendatur? Nam nihil præterea possident, ad quod regressum suum creditores habere possint; quæ autem habebant, alienata sunt, & ita quidem, ut non transierint cum sua causa, sed sine ea. Igitur ut hæc absurditas eviteretur, statuendum est, opinor, in hypotheca legali Statutum cessare. Sequitur (2) alterum argumentum. Statuta hypothecæ tacitas agnoscunt, imo earum numerum augent, quod utique jure fit; nam necessarium non est, ut hypotheca tacita ex legis Romanæ dispositione descendat, sed leges hodiernæ sufficiunt, cum utique leges nostræ tam leges sint, quam Romanæ. Beyer *ad Tit. ff. in quib. caus. pign. Posit. 1. lit. e.* Si autem Statuta hypothecam tacitam agnoscunt, debent etiam agnoscere effectum, alias enim fatua forent; effectus autem, ut dixi, nullus est, si bonis a debitore venditis extinguatur, nec ad tertium possessorem transfertur. Denique (3) major est potestas legis, quam conventionis; Ergo & leges suo pignori majorem

majorem firmitatem conciliare possunt, quam homines privati. Atque hæc argumenta sufficiant.

Thef. XI.

Porro controvertitur, an hoc Statutum locum habeat, si mercator ad institorem, vel Factorem suum, mercem mittit, & is debitori suo eam oppignorat, ita ut dominus mercis non ab eo, cui oppignorata est, eam repetere possit, sed cogatur actionem suam contra mandatarium, vel factorem, instituere? Ad quam quæstionem, si jus Romanum spectamus, negative omnino respondendum erit: nam sicuti procurator, quatenus formam mandati excessit, eatenus procurator esse non intelligitur, *L. 33. mandat.* adeoque contrahentes cum tam infideli procuratore nullam adversus mandantem sibi actionem acquirunt, mandanti potius libera est rei suæ vindicatio, *L. 1. §. 3. ff. de exc. rei vend. L. 5. §. 3. & 4. ff. Mandat. L. 12. C. eod.* ita similiter res in institore se habet, quoties ille regulam præpositionis suæ transgressus est. *L. 19. §. 3. L. 11. §. 5. de instit. act. cum simit.* Huld. ab Eyben *disp. prior. de Factor. cap. 10. num. 2. quæ est in ejus operibus, pag. 279. seqq.* Verum ad forum nostrum descendentibus aliter animus auresque consuefaciendæ sunt. Nam dimisisse me mercem ex potestate mea non invitum constat; si igitur institor eam tertio bona fide accipienti oppignoraverit, omnino contra institorem tantum agere possum, non contra tertium; id enim concluditur ex verbis Statuti nostri. Accedit consentiens praxis Batavorum: apud hos enim etiam viget paroemia juri

An Statutum obtineat in fraudulento institore?

nostro non dissimilis : Meubelen en hebben geen Gevolge / id est, *Mobilia non habent sequelam*, ex qua hanc propositionem formarunt : si institor merces sibi creditas contra domini voluntatem vendiderit, vel creditori suo oppignoraverit bona fide accipienti, vel nulla domini adversus possidentem persecutio datur, sed adversus institorem suum experiri debet, vel ita demum persecutio adversus creditorem institoris datur, si paratus sit pignus luere oblato debito. Neostad. *Cur. Suprem. Holland. decis. 85.* Anton. Matthæi *de auction. lib. I. cap. 18. num. 9.* & *param. Belg. 7. num. 7.* Voet. *ad Tit. ff. de instit. act. §. 4.* Et adjuvatur hæc propositio per commune brocardicum, quod in foro mercatorum procedatur summarie, atque ex æquo & bono, nec disputetur de apicibus juris, quod communiter approbatur ab omnibus. *Zaf. Volum. 1. Consil. 15. num. 53.* *Gail. 2. Observ. 27. num. 27.* *Klock. Volum. 3. Consil. 135. num. 144.* In foro autem Hamburgensi eo minus de veritate hujus sententiæ dubitare convenit, quoniam Magnificus Dn. Vincentius Müllerus in *Not. ad Part. II. Tit. 2. Art. 7.* testatur, ita judicatum esse in causa *Arend Mattiesen contra Nicolaum Behrens* 27. Januar. 1612.

Statutum non obtinet in locatione conductione, secus ac putant viri docti.

Thes. XII.

In locatione conductione an locus sit Statuto nostro? dispiciamus. Exempli gratia, Mevius Titio aurifabro poculum argenteum dedit deaurandum, aut reparandum, Titius autem Cajo illud oppignorat, an Mevius suum recuperare a Cajo potest, utrum vero a rei vindicatione excluditur? Excludi jure Hamburgensi

genſi putat Antonius Matthæi, *paræm. Belg. 7. num. 7.*
Si rem, inquit, tuam mobilem alii commodaveris, LOCAT-
VERIS, isque vendiderit tertio bona fide accipienti,
transit in eum dominium, denegata tibi rei vindicatione,
licet absque tua voluntate alienata sit; ita Saxonibus,
& nominatim Lubeca, HAMBURGO placuisse tradit
Mevius ad jus Lubecense Part. III. Tit. 2. Art. 1. & 2.
 Hucusque Matthæi. Eum sequitur Johannes Strauchius,
de oppignoracionibus rerum imperii §. 14. & Stryckius,
in Ulf. Modern. ad Tit. de rei vindicat. §. 7. Sed apud
 Mevium, cujus autoritate utitur Matthæi, ne verbum
 quidem exstat *de LOCATO*; Et quomodo posset Mevius
 hoc dicere, cum in *Jur. Lubecensi Lib. 3. Tit. 8. Art. 17.*
 expresse contrarium constitutum sit, nempe, ut si opi-
 fax materiam seu rem faciendam acceptam vendide-
 rit, aut oppignoraverit, dominus ejus vindicanda pō-
 testatem habeat a quovis possessore, nec huic aliud,
 quam manus pretium, das Macher, Lohn/ solvere te-
 neatur. Et eodem modo jus Hamburgense quoque
 hunc casum definit, *Part. II. Tit. 9. Art. 18.* his verbis:
 Wird ein Handwercks-Mann dasjenige/ so ihm zu ar-
 beiten anvertrauet/ verkauffen oder verſeßen/ so iſt
 derjenige/ dem das Zeug zukömmt/ näher dabey zu
 bleiben/ dann der/ welchem das Zeug verkaufft oder
 verſeßt iſt/ und darff demſelbigem/ bey welchem er ſein
 Zeug findet/ nicht mehr als das Macher-Lohn/ so
 daran verdienet iſt/ bezahlen. De ratione hujus juris,
 & quare diverſum in locato placuerit, video diſceptari.
 Ego cum nihil certi habeam, ad conjecturas delabor,
 quas confirmare fortassis poſſem, ſi mihi per longin-
 quitatem

equitatem loci daretur, veteres Codices Statutorum nostrorum excutere. Prorsus enim mihi persuadeo, hanc de locato additionem novam esse, & eo demum adjectam tempore, quo jus Romanum cristas erigere, & jus Germanicum de folio suo deicere cœpit; nam differentia ratio inter locationem, & cœteros contractus nulla facile assignabitur, per quam evincatur, quod in commodato, pignore, &c. fidem debitoris mei sequi debeam, non autem in locato. Cœterum ita lex scripta est, decetque adeo Jurisconsultos eam sequi, non autem in rationem ejus scrupulose inquirere.

Thef. XIII.

*Statutum
obtinet in
deposito.*

Sed in deposito Statuti vim se exercere, Interpretes juris patrii, Viri Gravissimi Dn. Henricus Meurer / & Dn. Nicolaus von der Fichte statuunt, quorum hic propterea deponentem admonet diligentia, ut sedulo antea depositarii sui conditionem exploret; nam si depositarius, verbi causa, cistam clausam aperiret, & pretiosa quædam interverteret, non possem, *inquit*, eam rem a tertio bonæ fidei possessore vindicare. Hoc testimonium Viri in rebus agendis versatissimi nobis sufficere potest, etsi cœteroquin de praxi Lubecensi contrarium asserat Marquardus, ut dixi *thes. 8. pr.* Attamen hoc tantum intelligi volo de deposito voluntario, non de miserabili. Dicitur enim in Statuto, si quis rem cum voluntate sua dimiserit, wenn er sie mit seinem Willen aus seinen Gewehren läßt; tunc cessare rei vindicationem: quod de eo, qui tempore tumultus, incendii, ruina, deponit, dici fere non potest; nam
qui

*non tamen
in deposito
miserabili.*

qui tali necessitate coactus deponit, is omnino mal-
 let, si necessitas abesset, non deponere. Deinde nec
 illud commodè de ejusmodi deponente affirmatur,
 quod depositarii fidem secutus fuerit; quippe cum
 nullum ipsi tempus hunc illumve præ alio potius e-
 ligendi suppetierit. Denique depositum miserabile
 alias privilegiatum est, præcipue, quod ex inficia-
 tione lis crescat in duplum. *L. 1. §. 1. ff. de posite.* id quod
 specialiter quoque jure nostro receptum est, *Part. II.*
Tit. 3. Art. 17. Ergo neque hic mirum videri debet,
 meliorem esse depositi miserabilis, quam voluntarii,
 conditionem.

Theol. XIV.

His omnibus, quæ hactenus dicta sunt de do- *Remove.*
 mino a rei vindicatione excluso, videtur ob stare *Art. sur ob-*
§. Tit. 3. Part. II. qui Articulus eo magis observan- *jellie.*
 dus est, quia quotidie in praxi ita respondetur. Verba
 ejus sunt hæc: Welcher Mann etwas kauft/der sol sich
 versehen/ und eigentlich wahrnehmen/ was und von
 wem Er kauft. Dan wan ein Gut gestohlen/ ge-
 raubet und abgetrogen ist/ und der rechte Herr desel-
 bigen Edmt/ und glaubwürdige Anzeige thut/ daß
 solches Gut sein gewesen/ und noch sei/ so mag Er
 dasselbige mit Vorwissen des Richters ohne alle Ent-
 geltniß und Bezahlung des ausgegebenen Kauff-Gel-
 des wiederum an sich nehmen. Duo enim dubia ex
 hoc Articulo formari possunt. Primum ex verbo;
 abgetrogen. Nam si quis rem suam alteri ex com-
 dato, vel alio modo, tradat, & is illam vendat vel oppig-
 noret, recte dici de eo videtur, daß Er es dem com-

modantē abgetrogen. Deinde nulla apparet ratio diversitatis, quare dominus non sit a rei vindicatione exclusus, si rem, quæ ipsi furto ablata erat, alter bona fide emerit, sit autem exclusus tunc, cum ea res non ex ejus domo, sed ex commodatarii custodia direpta est. Verum ut ad primum respondeamus, concedimus quidem libenter, quod commodatarius dolose agat, rem commodatam alienando; sed in nostro Articulo per verbum *abgetrogen* non intelligitur quilibet dolus, sed talis, qui tunc intervenit, cum res ex alterius potestate ablata est; dolus autem commodatarii ex postfacto demum accidit, non statim eo tempore, quo res commodata fuit. Ergo quanquam dicere de commodatario tali possumus, quod fraudulenter in re commodata versatus fuerit, & præter officium boni viri, non possumus tamen de eo dicere, quod dolose rem commodatam commodanti extorserit, *daß Er Sie ihm abgetrogen*, quam potius alter libenter ipsi tradidit. Ad alteram respondemus, apparere omnino rationem diversitatis inter hos duos casus, quod dominus rei vindicationem habeat in re, quæ ipsi per fures subtrahita est, & quod eam non habeat in re alteri commodata, quam ille commodatarius vendidit. Ea ratio non est alia, quam illa generalis Statuti nostri *in thes. 5.* explicata, nempe hæc: *da einer seinen Glauben gelassen*, *da muß er ihn wieder suchen*. Hoc obijci potest domino, qui rem alteri commodavit, non potest obijci domino, cui fur suam abstulit: is enī nullius fidem secutus est, sicut prior ille fecit. Nam *in Parte II. Tit. 2. Art. 7.* exclu-

excluditur dominus a rei vindicatione, si rem sanctam
 sua voluntate, mit seinem Willen: at in hoc arti-
 culo de 2^o sermo est de casu, si dominos circa suam
 voluntatem furipsum. *Thesi. XV.* *De 2^o sermo*
 183. Coeterum notandum est, maximopere, quod
 quemadmodum in Saxonia, ut supradicti. 4. diximus,
 multi constitutionem juris nostri pati non potuerunt,
 ita de in Republica nostra, pariter, existerint, quibus
 ea dura & iniqua visa fuerit. Communicavit enim
 merum vir Magnificus atque Excellentissimus, quem
 antea nominavi, quemque iterum, ut merita illius in
 me postulant, honoris causa, nomino, Dn. Winkle-
 rus, Correctiones Statutorum Hamburgensium, ex quibus
 ejusmodi quid firmiter concludo. His correctionibus
 prefatio praefixa est, nomine Consulum & Senatus
 concepta; interea, me latet, quo anno sint editae?
 quum a civibus approbatae? an habeant vim legum?
 & an in foro observentur? quas quaestiones, quum
 procul patria constitutus sum, indecisas nunc relinquere
 oportet. Verba autem correctionis ipsius *ad Part. I. tit. 2. Art. 7. vers.*
der es erstlich verlichen / haec sunt: *So mag / der es erslich verlichen / daselbige Gut / wo er es findet / ohne Unterscheid / condiciren und vindiciren / und wann er den Eigenthum erwiehlet ist der Inhaber ihm daselbige als ein gestohlnes Gut ohne Entgeld zu restituiren schuldig: doch soll solches ferner nicht / als in dem ersten Besigep statu haben: da aber derselbe von dem Zuspruch / bange wird, und unwissend / dass es mit dem Gute solche Beschaf-*
 -schaft

De corre-
 ctione Sta-
 tuti P. II.
 Tit. 2. Art.
 7.

schaffheit habe / daselbe alienirt / mag er wegen der
 Rauff-Gelder nicht belanget werden / wie den auch der
 andere folgende possessor, wo er bona fide selbes Gut
 erlanget / von allen Anspruch entfreiet bleibet. Da
 er aber auch den Entlehner oder dessen Erben des-
 wegen zu belangen gemeinet / sol ihm gebühlich Recht
 ertheilet werden. Ex his verbis satis perspicimus,
 quatenus Statutum nostrum; quia nimis rigorosum
 visum fuit, mitigatum sit, ita nempe, ut dominus non
 omnino excludatur a rei vindicatione, sed hoc tantum
 casu, si a primo bonae fidei emtore res iterum aliena-
 ta, & ad secundum pariter bona fide translata fuerit,
 non autem, si adhuc extet apud primum emtorem.
 Quilibet videt, hanc emendationem ideo placuisse,
 quia blanditur specie æquitatis, quæ tamen revera
 non adest. Quis enim excogitabit sufficientem ali-
 quam rationem diversitatis, quare illud injustum sit,
 quod dominus excludatur a rei vindicatione per pri-
 mum emtorem, illud autem justum, quod per se-
 cundum emtorem facultate rei vindicationem insti-
 tuendi privetur. Et tamen huc tendit tota Statuti
 correctio, quæ vult, ut contra primum possessorem
 realis actio institui possit, non autem contra secun-
 dum. Neque mihi satisfacit ratio, quam Vir doctus
 pro justificanda correctione adduxit in *Notis ad cam-*
ls putat, primum possessorem sibi imputare debere,
 quod non melius inquisiverit in conditionem illius,
 cum quo contraxerit, hanc autem culpam non posse
 imputari secundo possessori, qui causam ab ipso non
 habuerit. At profecto, si aliqua culpa est primi pos-
 sesso-

21
 fessoris, eadem erit & secundi. Primus possessor, *inquis*, debuit inquirere in conditionem commodatarii, rem alienam distrahens; sed Resp. nullam fraudem suspicatus est; fuit enim in bona fide. A secundo possessore, *ita pergit*, tale quid requiri non debet, is enim non contraxit cum commodatario; sed Resp. etsi non contraxit cum commodatario, contraxit tamen cum tali, qui non majus habet jus, quam commodatarius. Aut itaque omnes possessores, sive primi sint, sive secundi, tuti esse debent, ut dominis denegetur contra eos rei vindicatio, aut nulli: causa certe non est, quare secundis possessoribus plus tribuamus, quam primis. Hoc meum est iudicium de correctione Statuti, eam scilicet cum regulis aequitatis non omnino convenire. Coeterum quid in praxi obtineat, an secundum Statutum ipsum, utrum secundum correctionem ejus judicetur, jam antea professus sum, me nescire.

Thes. XVI

Quemadmodum autem per hanc correctionem *Correctio* domini commodantis melior facta est conditio, ita *Statuti in* e contrario in correctione *Partis II. Tit. 4. Art. 2. Part. II.* creditori plures difficultates obiectae sunt. Diximus *Tit. 4. Art. 2.* nempe supra, *thes. 9. in f.* quod hypotheca in bonis immobilibus constituta inhaereat rei, & nostro etiam jure transeat ad quemcunque boni oppignorati possessorem, indistincte, possitque adeo creditor adversus eum agere hypothecaria, nisi praescriptio accesserit. Sed in correctione aliae adhuc conditiones adduntur his verbis: *Wosern der Gläubiger beweisen*

wird / daß der debitor zur Zeit der hypothecation solch
Gut als sein eigen besessen / wie auch der principalis
debitor, und wo er Bürgen gestellet / auch dieselbe ge-
bührlich excutirt und unzahlbar befunden. Ex quo
apparet, cum secundum Statutum creditori jus sua
hypotheca in bonis immobilibus fundata persequi li-
ceat adversus quemlibet possessorem, sine ulla restrictio-
ne praeter praescriptionis exceptionem; id valde limi-
tari in correctione Statuti, in qua additur, ut creditor
actione hypothecaria adversus tertium possessorem
usurus demonstrat, debitorem tempore oppignoratio-
nis bonum oppignorum jure domini vel quasi pos-
sedisse: quae probatio quam sit difficilis, abunde constat,
& explicavit ex instituto Magnificus Dn. Schroëterus,
Disput. de probatione domini; ut adeo haec conditio cre-
ditori injuncta, de dominio debitoris sui, maxime diffi-
cilis sit. Sic illud quoque ad incommodum creditoris
spectat, quod prius excutere jubeatur debitorem prin-
cipalem, nec hunc modo, sed fidejussores quoque,
si qui obligationi accesserint; id enim prorsus finem,
quem alter hypothecam flagitando intendit, perimit.
quandoquidem hac ipsa de causa pignoribus datis no-
bis cavere solemus, ut, si forte debitor in mora sol-
vendi sit, nos sine ambagibus nostrum consequamur;
quia expedit pignori potius incumbere, quam in per-
sonam agere. §. 16. *Instit. de oblig. quae ex del. nasc.*

*Commoda-
rarium
non esse
dominium
jure Ham-
burgensi.*

Coeterum an in praxi nostra ad hanc correctionem
relpiciatur, aequè cum ignarissimis scio,
Thes. XVII.


Ad extremum occurrendum est vulgari errori,
quo

quo multi imbuti sunt. Statutum nostrum non recte interpretantes. Inferunt enim ex eo, quod iure poss. & dominium rei commodatæ & depositæ in commodatarium & depositarium transferatur. Ita sentium Welschbæc. ad Tit. ff. Commodat. num. 7. Schultz. Synops. Instit. ad Tit. Q. M. R. C. Q. num. 6. Treutler. Volum. I. diss. 24. thes. 2. lit. g. Carpzov. Part. 2. cons. 26. def. 5. num. 2. Verum eos refutant Mevius ad Jus Lubecense Part. III. tit. 2. Art. 2. Schilterus Exercit. 25 §. 3. Kress Spec. Jurispr. forens. lib. 3. tit. 10. §. 5. in Not. Nam in dubio nunquam dominium translatum iudicatur, quia res est facti, quæ probatione indiget. Lub. C. de probac. at si contractum commodati vel depositi respicimus, statim patet, naturam horum contractuum non pati, ut dicamus, eo tempore, quo initi sunt, contrahentes de dominio transferendo cogitasse. Deinde textus Iuris Germanici a Schiltero, & Kressio adducti repugnant. Denique hac ratione, si verum esset, commodatarium fieri dominum, Statuti nostri magna pars inutilis redderetur & frustranea foret. Efficiam clarissime, ut id omnes intelligant. Sententia Statuti nostri hac est, dominum a rei vindicatione excludi, si commodata res ex manibus commodatarii ad tertium aliquem pervenerit, sive ipse commodatarius eam fraudulenter alienaverit, sive alius commodatario eam surripuerit, & inscienti tertio vendiderit. Habemus autem & aliud Statutum Thef. 14. adductum, cujus vi dominus habet rei vindicationem, eo casu, quo res ipsi a fure erepta fuit. Iam si commodatarius est dominus rei commodatæ, illaque res ipsi a fure aufertur, poterit ipse rei vindicationem instituere adversus tertium possessorem, vi Statuti Thef. 14. citati, & sic Statuti Thef. 2. allegati, ad quod commentatio nostra pertinet, bona pars vana erit, & sine effectu: illa scilicet pars, qua constituitur, ut neque tum rei vindicatio contra tertium possessorem obtineat, quando res commodatario surrepta est. Non autem paritur reverentia, quam Legislatoribus debemus, ut statuamus,

eos scrupulose aliquos casus decidisse, qui tamen nunquam in praxi obventuri sint; id enim hominis fatui foret, non sapientis. Superest adhuc aliud argumentum, quod ostendit, commodatarium jure Hamburgensi non censi esse dominum; nam si pro domino haberetur, deberet etiam ferre periculum & casum fortuitum in re commodata contingentem, propter regulam: *res perit suo domino*; at vero, quod non præstat casum fortuitum, diserte exprimitur in *Part. II. Tit. 2. Art. 5.* his verbis: *Würde aber nun über solchen angewendeten gebührlischen Fleiß/und in dem Gebrauch/dazu es ihm geliebet worden/aus unversehener unglücklichen Zufall/ einig Schaden beschehen/ ist der Entlehnner zu Erstattung desselben nicht verbunden*; et si diffiteri non possum, in hoc sequi Statuta nostra Jus Romanum, & Jus Germanicum deferere, secundum quod commodatarius damnum, quod casu fortuito in re commodata accidit, ferre jubetur. *Spec. Saxon. lib. 3. art. 5.* de cujus iustitia varie disputatur, cum alii Jus Romanum præferant, ut Dn. Lyslerus, *Collat. Jur. Saxon. & Roman. disp. 2. §. 9. & 10.* & Dn. Gribnerus, *peculiari disputatione, de æquitate legum Romanarum circa periculum rei commodate*, alii autem Jus Germanicum, ut Grotius *de Jure B. & P. lib. 2. cap. 12. §. 13. num. 1.* Pufendorfius *de Jure Nat. & Gent. lib. 5. cap. 4. §. 6.* & Schilterus *Exercit. 25. §. 16.* quam controversiam hunc meam non facio.

Et hæc sufficiant de hoc paradoxo Juris Hamburgensis, quo dominus a rei vindicatione excluditur. Si non omnia dixi, quæ dici de hac materia poterant, puto tamen, me nihil eorum, quæ dici debebant, præterisse. Allegationibus superfluis Autorum omnino abstinendum esse duxi, memor ejus, qui dixisse fertur: *legem querere, ubi est ratio naturalis, est infirmitatem intellectus*, apud Surdum *de aliment. Tit. 1. Qu. 45. num. 58.* Si ab aliis dissentientum fuit, feci id modeste, & ita, ut ipse quoque mecum agi vellem, si cui nostra minus se probabunt,

S. D. G.



Jure Ger-
manico
commoda-
tarius ca-
sum pra-
stare de-
bet; re-